

**REGIONAL NEWS BULLETIN
HEADLINES (EVENING)**

Date – 26/01/2025

Time - 18:30 Hrs

1. Republic Day vawi 76-na, ram pumah ropui taka lawm a ni.
2. Mizorama a lawmna pui ber Aizawl lammualah chuan Larsap General Vijay Kumar Singh-an a sorkarin 'Bana Kaih' ruahmanna hmangin Mizoram hi nasa taka chawikan a tum tih a sawi.
3. February ni 12 a village council (VC) inthlan lo awm tur atana hming pe lut mi 6,942 te hming pek luh chu endik hnu-ah pawm a ni.

<><><>

R-DAY IN DELHI

Vawiin khan ram pumah Republic Day vawi 76-na, ropui taka lawm a ni a, a lawmna pui ber, New Delhi-a Kartavya Path-a neihaah President Droupadi Murmu-in hnam puanzar pawt pharhin parage contingent-te chibai a chhang let a ni.

Delhi-a Republic Day lawmnaah hian Indonesia President, Prabowo Subianto chu khuallian a ni a, parade-ah hian Indonesia atangin member 190 awmna band contingent pawh an tel ve a ni. Swarnim Bharat : Virasat aur Vikas tih thupui hmangin state, union territory leh sorkar laipui hnuaiia ministry leh department hrang hrang 31-in tableaux an entir a, Indian Airforce indo thlawhna chi hrang hrang an thlawk kual bawk.

Kumin Republic Day lawmnaah hian ramchhung hmun hrang hrang atangin sawm bik mi sing 1 an tel a, heng zingah hian thingtlang khaw hruaitu Sarpanch te, kut themthiamte, SHG member-te, ASHA leh Anganwadi worker-te leh kawngpui siam hna thawktute an tel a ni.

<><><>

R-DAY: AIZAWL

Mizorama a lawmna pui ber Aizawl lammualah chuan Larsap General Vijay Kumar Singh chuan a sorkarin 'Bana Kaih' ruahmanna hmangin Mizoram chu nasa taka chawikan a tum a ni a ti.

Hnam puanzar a kaih parh hnu ah thu sawiin larsap chuan mahni kutkawiha eizawngtute leh kuthnathawktute puih na'n leh Mizoram ei leh bar dinhmun chawisan leh intodelh na'n "Mizoram Bana Kaih (Hand holding) Scheme" chu nikum September thla khan a tlangzarh ani a ti a, he hmalakna hi Viksit Bharat 2047 (kum 2047 a ram changkang zinga India a tel ve theihna tur) leh United Nations Sustainable Development Goals (SDGs) hlenchhuah theih nana tangkai tak a ni tel dawn a ni a ti.

General VK Singh chuan 'Bana kaih' ruahmanna hnuaiia thuang pakhat - Chief Minister's Special Category Scheme hnuaiia sum hlawm a puih a cheng nuai khat thleng pek theih a nih bawk dawn thu a sawi a. Bana-kaih ruahmanna hnuaiia hian sorkar chuan thlai chi li - Sawhthing, Hmunphiah, Aieng leh Mizo Hmarchha tan Minimum Support Price (MSP) tih sawiinsiam a. Hemi awmzia chu Sorkar in rate a siam ai a a hralhna tur man zat a hniam zawk chuan sorkar in kuthnathawktute hnen atangin heng thlai te hi a lei sak dawn a ni, a ti.

Larsap chuan Mizoram chu state ralmuang tak a la ni thei zel niin a sawi a. Hmun thenkhatah harsatna tlem lo awm thin mahse venhimna hna thawktu Mizoram Police te'n uluk taka an vil thin avangin boruak muanawm tak a la awm thei reng a, a lawmawm hle a ni a ti. State leh state inkar ramri ah pawh ngawrh takin venhim hna thawh a nih avangin ral a muang tih a sawi a. Assam nen a ramri chungchanga inbiakna pawhin hma a sawn zel niin a sawi. Dan phalloh thil lakluh leh ramri a buaina dang chhuak thei ven kawngah hna an thawk tha hle niin a sawi bawk a. Nikum chung khan kuhva tawlhruk Kg nuai 12, sing 5, sang 8 leh 493 manin, hemi kaihnawih ah hian Mizoram Police chuan mi 173 an man a ni, a ti. He'ng bakah hian sialai leh puaktheithil dang leh ruihhlo thahnem tak an man thu a sawi bawk.

Ruihhlo do hna theihtawp chhuah thin anih thu leh Mizoram Police leh Excise & Narcotics te ngawrh taka an thawh zarah nikum chung khan mi 4,568 man niin thubuai 4,619 ziah luh ani a ti a, chak zawka ruihhlo do hna thawh anih theih na'n Kohhran leh tlawmngai pawl hrang hrangte thawhpui zui zel turin a sawm bawk a ni.

Larsap chuan National Education Policy 2020-in a phut angin State Sawrkar hnuai a University din turin hmalakna kalpui mek zel a ni, a ti a. Higher & Technical

Education department pawhin Mizoram State University a rang thei ang bera an neih theih na'n chak takin ruahmanna an kalpui mek a ni, a ti bawk.

<><><>

R-DAY: AKASHVANI, HC BENCH

Akashvani Aizawl pawhin Tuikhuahtlanga an hmun puiah he hun hi an hmang a. Station Director DR Lalropuia chuan India Republic Day-ah India president hmasa ber Dr. Rajendra Prasad leh Prime Minister Jawaharlal Nehru te an hre reng tih a sawi a, India chuan khawvel a ram hmasawn zinga chhiar tel turin hma a la mek tih a sawi a ni.

Republic Day Vawi 76-na hi Gauhati High Court, Aizawl Bench, ah pawh lawm a ni a. Judge Justice Nelson Sailo-in India Hnam Puanzar pawt pharh. He hunah hian Gauhati High Court Judge, Justice Marli Vankung, Aizawl Bench Registrar Dr. H.T.C. Lalrinchhana te bakah Aizawl Bench-a Registry thawk lai te leh Pensioner te, District and Sessions Judge Pi Helen Dawngliani, Aizawl District Court-a Judge-te, Law Department hotute leh Mizoram Bar Association Member te an tel bawk a ni.

<><><>

R-DAY: DISTRICTS

Kolasib ah chuan Republic Day hi tukin khan bawrsap Pisa tualah hmangin, bawrsap Pu Robert C. Lalhmangaiha chuan Hnam puanzar pawt pharh. Champhai-ah chuan Republic Day lawmna hi Chhangphut Field ah buatsaih niin Champhai District Bawrsap Pu V.L.Remliana'n chuan hnam puanzar a pawt pharh. Serchhip-ah pawh Republic Day hi Serchhip Sports Complex-ah lawm a ni a, district bawrsap Pu Paul L. Khuma'n hnam puanzar a pawt pharh.

Saitual district-a Republic Day lawmna-ah chuan District Bawrsap Dr. Lalngura Tlau chuan hnam puanzar a pawt pharh a, Lawngtlai a, Central YLA khelmual-a lawmna-ah bawrsap Pu Cheemala Siva Gopal Reddy-an hnam puanzar a pawtpharh. Mamit-ah GSA Playground-ah district bawrsap Pu K. Lalawmlova'n hnam puanzar a pawt pharh ani.

Hnahthial District-ah chuan Football Association Turf ground-ah district bawrsap Pi Rita Lalnunmawii Pachuau-in hnam puanzar a pawt pharh a, Khawzawlah chuan Mualvawm Playground-ah Khawzawl district bawrsap Pu K. Vanlalthiana'n hnam puanzar a pawtpharh a. Siaha-ah chuan S DFA Ground, Meisatla-ah District Bawrsap Pu VL Hruaizela Kiangte in hnam puanzar pawt pharh. Lunglei-ah chuan Thuamluaia Mualah district bawrsap Pi Navneet in hnam Puanzar pawt pharh a, District khawpui bakah hian Sub-Division hmunpui hrang hrangah leh khaw lian deuhah te pawh Republic Day vawi 76-na hi urhsun taka lawm a ni.

<><><>

AIR NEWS ON SOCIAL MEDIA

Chanchinthar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchinthar hi ngaihthlak leh chhiar theih a dah a ni. Naktuk zing dar 7 leh a chanve-ah Chanchinthar puan leh a ni ang.

<><><>

VC, LC CANDIDATES

Thla thar February ni 12 a village council (VC) inthlan lo awm tur atana hming pe lut mi 6,942 te hming pek luh chu endik hnu-ah pawm a ni.

State election commission (SEC) hotute sawi dan chuan VC bakah Aizawl Municipal Corporation (AMC) leh Lunglei Municipal Council (LMC) inthlan lo awm tur chuh tumte hming pek luh hi Zirtawpni khan VC leh LC inthlanna tur khua leh veng tina returning officer-te'n an endik a. Mizoram district 9-a VC 544 a bial 2,416 chuh tura hming pelut zinga hming pek luh 6,942 chu pawm a ni a. VC 544 a bial 2,416 hi a vaiin chuhtu 6,942 an awm a. Hetih lai hian duh duhina chuh theih bial 1,803 chuh tura hming pelut, an nomination endik hnu a pawm chu mi 5,267 an ni a, hmeichhe tana hauh bik bial 613 chuh tu tur mi 1,675 an awm bawk a ni.

AMC huam chungah local council (LC) bial 575 a awm a, LC inthlan chuhtu zawng zawng hi 1,664 an ni. Bial hauh bik awm lo 418 awmin he'ng bial chuhtu hi mi 1,215 an awm a. Hmeichhe tana hauh bik bial 157 chuh turin mi 449 an awm bawk. LMC huam chungah bial 148 a awm a, he'ng zinga duh duhin an chuh theih bial 116 hi candidate 312-in an chuh a, hmeichhe puala dah bial 38 chuhtu mi 108 an awm bawk a ni.

Naktuk chawhnu dar 3 thleng khi chuh tuma hming pete tana inhnuhdawh hun a ni a. Hemi hnu-a inhnukdawk lote chu inthlan chuhtu tak taka ngaih an ni ang. Hemi ni tlai lamah vek hian inthlanna a an chhinchhiahna (symbol) hman tur tihfelsak an ni ang a, inthlan chuhtute hming tar chhuah nghal a ni bawk ang.

Hetih lai hian Lawipu LC a ZPM candidate Pu Ismael Jongte (60) chu Inrinni zing khan a thi a. A aiawhtu tur hi nimin khan tihfel leh nghal a nih thu SEC thuneitute chuan an sawi a ni.

<><><>